



## **PRAVILNIK O ZAŠTITI OD POŽARA**

*Decembar, 2024. godine*

Na osnovu člana 51. Zakona o visokom obrazovanju Tuzlanskog kantona („Službene novine Tuzlanskog kantona“, broj: 21/2021 - prečišćen tekst, 22/2021 - autentično tumačenje, 5/2022, 11/2022 i 16/2022) i člana 37. Statuta visokoškolske ustanove Univerziteta FINRA Tuzla, na 5. (petoj) sjednici održanoj dana 26.12.2024. godine, Upravni odbor visokoškolske ustanove Univerziteta FINRA Tuzla (u daljem tekstu: Univerzitet), donosi:

## **PRAVILNIK O ZAŠTITI OD POŽARA**

### **I. OPŠTE ODREDBE**

#### **Član 1. (Predmet regulisanja)**

- (1) Pravilnikom o zaštiti od požara (u daljem tekstu: Pravilnik) utvrđuje se način sprovođenja i unapređenja mjera iz oblasti zaštite od požara na Univerzitetu.
- (2) Ovim Pravilnikom utvrđuje se sljedeće:
  - mjere zaštite od požara koje se moraju sprovesti na Univerzitetu i obaveze radnika u pogledu kontrole i sprovođenja propisa iz oblasti zaštite od požara i radnih uputstava,
  - organizacija poslova zaštite od požara na Univerzitetu, djelokrug i ovlaštenja lica zaduženog za poslove zaštite od požara, te njegovu školsku ili stručnu spremu,
  - način vršenja unutrašnje kontrole sprovođenja mjera zaštite od požara te dužnosti, odgovornosti i ovlaštenja radnika koji tu kontrolu neposredno vrše,
  - postupak i način upoznavanja radnika prilikom stupanja na rad ili rasporeda sa jednih poslova i radnih zadataka na druge, sa opasnostima od požara na tom radnom mjestu, kao i način obuke radnika iz oblasti zaštite od požara i rukovanja opremom i sredstvima za gašenje požara, odnosno upoznavanje radnika sa mjerama zaštite od požara,
  - vrsta i količina opreme i sredstva za gašenje požara na Univerzitetu, raspored opreme i sredstava, kao i vrijeme povremenog ispitivanja njihove ispravnosti,
  - zadatke Rektora, rukovodećih radnika, te radnika koji imaju posebna ovlaštenja i odgovornosti u pogledu sprovođenja zaštite od požara
  - odgovornost radnika zbog nepridržavanja propisanih mjera ili naređenih mjera iz oblasti zaštite od požara, dužnosti i ponašanje radnika u slučaju izbijanja požara i slično,
  - mjesto i prostori na kojima su zabranjeni proizvodnja, korištenje i prenošenje otvorene vatre,
  - disciplinska odgovornost za radnike zbog nepridržavanja propisanih mjera zaštite od požara.

#### **Član 2. (Zaštita od požara)**

- (1) Zaštita od požara obuhvata skup mjera i radnji organizacione, tehničke i propagandne prirode, koje se poduzimaju u cilju spriječavanja izbijanja i širenja požara, otkrivanja i gašenja požara, te spašavanja ljudi i materijalnih dobara ugroženih požarom.
- (2) Zaštita od požara organizuje se i kontinuirano sprovodi na svim radnim mjestima i svim objektima gdje postoji mogućnost izbijanja i širenja požara. Mjere zaštite od požara preduzimaju se radi otklanjanja uzroka požara, spriječavanja izbijanja i širenja požara, te za otkrivanje i gašenja požara.
- (3) Zaštita od požara na Univerzitetu je sastavni dio redovnog poslovanja, rada i zaštite radnika i imovine, a sprovodi se u okviru redovnih radnih zadataka na svakom radnom mjestu.

#### **Član 3. (Osnovna prava i obaveze)**

- (1) Univerzitet je dužan da na najbolji mogući način organizuje poslove zaštite od požara, te da obezbjeđuje materijalno-tehnička sredstva i opremu za zaštitu od požara i gašenje požara, te da organizuje njihovo održavanje, kontrolu i ispitivanje.

- (2) Radnici na Univerzitetu dužni su da učestvuju u gašenju nastalih požara i spašavanju ljudi i materijalnih dobara ugroženih požarom.
- (3) Univerzitet kao podzakupac izgrađenog objekta, tehničko-tehnoloških procesa ili njihovih adaptacija i rekonstrukcija, dužan je primjenjivati propisane mjere i normative iz oblasti zaštite od požara.
- (4) Rukovodeći radnici, radnici sa posebnim ovlaštenjima i odgovornostima, kao i svi drugi radnici na Univerzitetu dužni su da u sprovođenju mjera iz oblasti zaštite od požara postupaju u skladu sa odredbama pozitivno-pravnih propisa koji regulišu ovu materiju, odredbama ovog Pravilnika, kao i svim drugim važećim aktima iz ove oblasti.
- (5) Sprovođenje mjera zaštite od požara je obaveza svakog radnika Univerziteta u djelokrugu njegovog radnog mjesta.
- (6) Odredbe ovog Pravilnika odnose se, pored radnika koji su u stalnom radnom odnosu na Univerzitetu, i na sva ostala lica koja su po bilo kom osnovu radno angažovana na Univerzitetu.

## **II. MJERE ZAŠTITE OD POŽARA**

### **Član 4. (Mjere zaštite od požara)**

- (1) Mjere zaštite od požara mogu biti: tehničke, upravne, organizacione, obrazovne i druge prirode kojima se sprječava izbijanje i širenje požara.
- (2) Tehničke mjere obuhvataju, prije svega, tehničke normative i standarde koji su doneseni na osnovu odredaba pozitivno-pravnih propisa koji regulišu ovu materiju.
- (3) Upravne mjere uglavnom su propisane zakonskim odredbama, a njihovo sprovođenje uređeno je i propisano odredbama ovog Pravilnika, te drugim pozitivno-pravnim propisima koji regulišu ovu materiju.
- (4) Organizacione mjere su predmet zakonske regulative i odnose se na pitanja odgovornosti za organizovanje i sprovođenje zaštite od požara.

### **Član 5. (Preduzimanje mjera zaštite od požara)**

U cilju sprječavanja izbijanja i širenja požara, Univerzitet preduzima mjere zaštite od požara, a naročito:

1. Na mjestima gdje se obavljaju poslovi i radni zadaci pri kojima postoji opasnost od izbijanja požara, moraju se postaviti posebna sredstva i oprema za prvu intervenciju u slučaju izbijanja požara (ručni aparati za gašenje početnih požara i slično).
2. Na mjestima gdje postoji povećana opasnost od pojave požara, sprovode se posebne mjere zaštite u zavisnosti od materijala kojima se rukuje.
3. U svim prostorijama gdje se odvija proces rada moraju biti postavljeni ručni aparati za gašenje početnih požara ili izvedeni zidni hidranti, ako je to predviđeno projektnom dokumentacijom, a električne instalacije moraju biti izvedene u skladu sa tehničkim propisima.
4. Kontrola ispravnosti aparata za početno gašenje požara mora se vršiti u ovlaštenoj organizaciji, društvu ili ustanovi, a prema važećim pozitivno-pravnim propisima i uputstvima proizvođača.
5. Ručni aparati za gašenje početnih požara kao i druga sredstva za gašenje požara moraju biti postavljena na vidna i lako pristupačna mjesta.
6. Na stepeništima, hodnicima i prostoru određenom za odvijanje transporta i kretanja radnika, ne smiju se držati nikakvi predmeti ili materijali, a posebno ne opasne i lako zapaljive materije.
7. Razvodni ormar u kojem su smještene električne instalacije mora biti zaključan i zabranjeno je u istom držati strane predmete.

## **Član 6.** **(Opšti principi rada)**

- (1) Izgradnja, adaptacija i dogradnja objekata Univerziteta može se vršiti samo uz odobrenje vlasnika objekta, uz uslov da se tim ne stvara opasnost od požara za sam objekat i druge objekte koji se nalaze u blizini.
- (2) Iz radnih prostorija Univerziteta mora biti omogućena bezbjedna evakuacija radnika u slučaju izbijanja požara, a putevi za evakuaciju moraju biti vidljivo označeni, stalno slobodni i prohodni.
- (3) Električne instalacije, ventilacioni kanali, toplovodne instalacije, gromobranske instalacije i dimovodni kanali koji se koriste za potrebe Univerzitet moraju se postaviti, odnosno izvoditi, koristiti i održavati prema propisanim tehničkim normativima i standardima, kao i uputstvima proizvođača.
- (4) Električne instalacije u objektima Univerziteta moraju biti izvedene u skladu sa tehničkim propisima, tako da ne predstavljaju opasnost za izbijanje požara.
- (5) Na glavnom razvodnom ormaru električnih instalacija u objektima Univerziteta mora biti ugrađena glavna sklopka za dovođenje cijelog objekta u beznaponsko stanje. Sklopka mora biti obilježena natpisom «GLAVNA SKLOPKA».
- (6) Održavanje električnih instalacija i uređaja, te uređaja na električni pogon, mogu vršiti samo ovlašteni radnici Univerziteta i lica koja su za te poslove stručna i ovlaštena. Na električnim instalacijama ne smiju se izvoditi bilo kakve improvizacije.
- (7) Pri vršenju bilo kakve opravke na električnim instalacijama i uređajima na Univerzitetu, isti moraju biti isključeni iz strujnog kruga.
- (8) Pregledi i ispitivanja električnih instalacija bitnih sa stanovišta zaštite od izbijanja požara na Univerzitetu (ispitivanje otpornosti izolacije, preopterećenja instalacije i slično), moraju se vršiti u skladu sa tehničkim propisima i to najmanje jednom u godini dana.
- (9) Pregledi i ispitivanja iz stava 1. ovog člana moraju se vršiti i nakon svake intervencije ili prepravke električne instalacije, te kada se posumnja u njenu ispravnost, kao i nakon većih havarija i oštećenja.
- (10) Ukoliko se pri opravci sredstava rada, instalacija i druge opreme vrše varilački radovi i radovi na rezanju metala, obavezno se moraju primjeniti dodatne mjere zaštite (obezbjedenje dodatnih aparata za početno gašenje požara, kanti sa vodom, posuda sa pijeskom i slično).
- (11) Prije početka izvođenja zavarivačkih radova i radova na brušenju i rezanju metala, moraju se iz neposredne blizine radova odstraniti svi zapaljivi materijali (piljevina, drvene ploče, iverica, kante sa gorivom, mazivom, krpe, papir i slično).

## **III. ORGANIZACIJA I NAČIN UNUTRAŠNJE KONTROLE, OVLAŠTENJA I ODGOVORNOSTI RADNIKA KOJI VRŠE KONTROLU**

### **Član 7.** **(Sprovođenje mjera iz oblasti zaštite od požara)**

- (1) Poslovi zaštite od požara na Univerzitetu su organizovani na nivou referata i obavlja ga lice zaduženo od strane Rektora, a prema odredbama Pravilnika o organizaciji i sistematizaciji poslova, radnih zadataka i radnih mjesta na Univerzitetu.
- (2) Sprovođenje mjera iz oblasti zaštite od požara je obaveza svakog radnika na Univerzitetu FINRA Tuzla, a u djelokrugu njegovog radnog mjesta.

**Član 8.**  
**(Odgovorna osoba)**

- (1) Rektor imenuje Osobu odgovornu za poslove zaštite od požara na Univerzitetu, i ta osoba obavlja sljedeće poslove:
- prati stanje iz oblasti zaštite od požara;
  - učestvuje u izradi općih akata iz oblasti zaštite od požara;
  - angažuje za potrebe Univerziteta stručne saradnike iz oblasti zaštite od požara;
  - vodi propisane evidencije i čuva dokumentaciju i isprave iz oblasti zaštite od požara;
  - učestvuje u izradi Programa mjera zaštite od požara;
  - organizuje obuku i provjeru znanja radnika iz oblasti zaštite od požara;
  - vrši neposrednu kontrolu sprovođenja mjera zaštite od požara na Univerzitetu utvrđenih odredbama ovog Pravilnika i odredbama pozitivno-pravnih propisa koji regulišu ovu oblast;
  - preventivno djeluje i vrši evidentiranje mogućih izvora opasnosti od izbijanja požara i određuje mjere zaštite;
  - vrši raspored sredstava i opreme za gašenje požara, kontroliše da li se u određenim rokovima vrši servisiranje i ispitivanje ručnih vatrogasnih aparata i hidranata;
  - kontroliše da li se u određenim rokovima vrši ispitivanje električne instalacije, uređaja, gromobranskih instalacija i slično;
  - privremeno obustavlja rad na radnim mjestima gdje ustanovi opasnosti i nedostatke koji bi mogli izazvati požar;
  - privremeno odstranjuje sa radnog mjesta radnike koji svojim radom krše i ne sprovode mjere iz oblasti zaštite od požara, angažuje po potrebi stručna lica i ustanove za obavljanje poslova iz oblasti zaštite od požara; i
  - obavlja i druge poslove predviđene odredbama pozitivno-pravnih propisa koji regulišu ovu materiju.
- (2) Radnik zadužen za poslove zaštite od požara mora imati najmanje srednju školsku ili stručnu spremu tehničke grupacije, potrebno radno iskustvo, te mora biti posebno stručno osposobljen za uspješno vršenje poslova iz oblasti zaštite od požara.

**IV. PRAVA, OBAVEZE I ODGOVORNOSTI RUKOVODEĆIH RADNIKA**

**Član 9.**  
**(Obaveze rukovodećih radnika)**

Svi rukovodeći radnici, svaki u djelokrugu svoga radnog mjesta, imaju posebna prava, obaveze i odgovornosti u sprovođenju mjera iz oblasti zaštite od požara.

**Član 10.**  
**(Obaveze Rektora)**

Rektor Univerziteta, kao najodgovornija osoba za organizaciju i sprovođenje mjera iz oblasti zaštite od požara, obavlja sljedeće poslove:

- Sprovodi opći akt kojim reguliše oblast zaštite od požara,
- organizuje poslove na Univerzitetu tako da se odredbe pozitivno-pravnih propisa i drugih općih akata iz oblasti zaštite od požara pravilno i potpuno primjenjuju,
- donosi i usvaja Program mjera zaštite od požara,
- stara se o obezbjeđenju radnih mjesta, gdje prijete opasnosti od izbijanja požara,
- razmatra stanje zaštite od požara na Univerzitetu najmanje jedanput godišnje,
- obezbjeđuje potrebna sredstva za sprovođenje mjera iz oblasti zaštite od požara, te vrši nabavku sredstava i opreme za gašenje požara,
- nadgleda i kontroliše rad ostalih radnika po pitanju sprovođenja mjera iz oblasti zaštite od požara,
- angažuje, za potrebe Univerziteta stručne saradnike iz oblasti zaštite od požara,
- obavlja i druge poslove u skladu sa odredbama pozitivno-pravnih propisa, a koje su neophodne za bezbjednost objekata i lica po pitanju zaštite od požara.

**Član 11.**  
**(Rukovodeći radnici)**

Rukovodeći radnici vrše sljedeće poslove:

- organizuju periodične preglede električnih instalacija, uređaja, gromobranskih instalacija i slično, a po pitanju primjene mjera iz oblasti zaštite od požara;
- brinu o pravilnom uskladištenju robe, proizvoda i zapaljivih materijala, te o stalnoj prohodnosti prolaza i prilaza u prostorijama objekta;
- brinu o tehničkoj ispravnosti sredstava rada, opreme i uređaja;
- vrše vizuelnu kontrolu i ispravnost električnih instalacija i uređaja;
- brinu o ispravnosti opreme i sredstava za gašenje požara (vatrogasni aparati i hidranti);
- predlažu RektorU Univerziteta preduzimanje odgovarajućih mjera vezanih za poboljšanje stanja iz oblasti zaštite od požara;
- predlažu RektorU Univerziteta otklanjanje određenih nedostataka u objektima i na sredstvima rada koji prijete izbijanju požara;
- zabranjuju pušenje u radnim prostorijama i prostorima gdje prijete opasnost od izbijanja požara;
- kontrolišu rad radnika po pitanju sprovođenja propisa, uputstava i mjera iz oblasti zaštite od požara;
- daju stručna uputstva radnicima kod obavljanja poslova gdje postoji povećana opasnost od izbijanja požara;
- privremeno odstranjuju radnika sa radnog mjesta koji svojim radom krši propise iz oblasti zaštite od požara;
- upoznaju radnika sa mjestima gdje se nalaze ručni vatrogasni aparati i druga sredstva za gašenje požara;
- obavljaju i druge poslove u skladu sa odredbama pozitivno-pravnih propisa i odredaba ovog Pravilnika, a po naređenju rektora.

**V. PRAVA, OBAVEZE I ODGOVORNOSTI RADNIKA**

**Član 12.**  
**(Prava i obaveze radnika)**

- (1) Svaki radnik u radnom odnosu na Univerzitetu, lice po bilo kome osnovu radno angažovano na Univerzitetu, kao i učenici i studenti koji obavljaju praksu na Univerzitetu, imaju sljedeća prava i obaveze:
- upoznati sa odredbama ovog Pravilnika, izvorima opasnosti i mjerama iz oblasti zaštite od požara na radnom mjestu na koje su raspoređeni prilikom stupanja na rad odnosno raspoređivanja na poslove i radne zadatke,
  - upoznati se sa mjestima gdje se nalazi najbliža oprema i sredstva za gašenje požara i sa načinom rukovanja tom opremom,
  - opremu i sredstva za gašenje požara čuvati od oštećenja,
  - kad primjete izbijanje požara odmah pristupiti njegovom gašenju svim raspoloživim sredstvima ukoliko ocijene da požar mogu ugasiti bez opasnosti po sopstveni život ili zdravlje,
  - svojim radom na radnom mjestu ne uzrokovati požar,
  - odmah obavijestiti neposrednog nadređenog radnika o uočenim nedostacima i nepravilnostima na sredstvima rada, opremi, instalacijama i sredstvima za gašenje požara.
- (2) Radnik je naročito odgovoran ako:
- namjerno ili nepažnjom izazove požar,
  - ostavlja zapaljive materije na mjestu koja za to nisu određena,
  - bez opravdanog razloga odbije da učestvuje u gašenju požara,
  - neodgovorno se odnosi prema opremi i sredstvima za gašenje požara, ili ih koristi u nedozvoljene svrhe,
  - neopravdano ili bez ikakve potrebe daje znak za izbijanje požara,
  - ne sprovodi propisane mjere iz oblasti zaštite od požara i poslove obavlja mimo uputstava i tehničkih propisa, i
  - upotrebljava otvoreni plamen ili puši u prostorijama gdje je to zabranjeno.

## **VI. NAČIN UPOZNAVANJA RADNIKA SA OPASNOSTIMA OD POŽARA**

### **Član 13.**

#### **(Upoznavanje radnika sa opasnostima od požara)**

- (1) Svaki radnik u stalnom radnom odnosu na Univerzitetu, lice po bilo kom osnovu radno angažovano na Univerzitetu, kao i učenici i studenti koji obavljaju praksu na Univerzitetu, moraju biti obučeni za gašenje požara i rukovanje ručnim vatrogasnim aparatima za gašenje početnih požara.
- (2) Provođenje obuke i provjera znanja radnika iz oblasti zaštite od požara iz člana 33. ovog Pravilnika vrši se u skladu sa odredbama pozitivno-pravnih propisa koji regulišu ovu materiju, odredbama ovog Pravilnika i odredbama Programa obrazovanja i provjera znanja radnika iz oblasti zaštite od požara.
- (3) Program obrazovanja i provjera znanja radnika iz oblasti zaštite od požara mora naročito sadržavati:
  - organizaciju zaštite od požara,
  - opasnosti i izvore izbijanja požara,
  - mjere zaštite od požara, te način rukovanja i održavanja ručnih aparata za gašenje početnih požara,
  - odgovornosti, prava i obaveze radnika iz oblasti zaštite od požara.
- (4) Univerzitet je dužan da najmanje jednom u toku jedne godine izvrši provjeru znanja svih radnika iz oblasti zaštite od požara.

### **Član 14.**

#### **(Obuka radnika)**

- (1) Obuku i provjeru znanja radnika iz oblasti zaštite od požara na Univerzitetu mogu vršiti stručna lica sa najmanje visokom ili višom školskom ili stručnom spremom vezanom za oblast zaštite ili druge tehničke struke, ako rade na poslovima zaštite od požara.
- (2) O izvršenoj obuci i provjeri znanja radnika iz oblasti zaštite od požara, odgovorno lice na Univerzitetu dužno je voditi evidenciju.

## **VII. VRSTA I KOLIČINA SREDSTAVA I OPREME ZA GAŠENJE POŽARA**

### **Član 15.**

#### **(Sredstva i oprema za gašenje požara)**

- (1) Na Univerzitetu na određenim mjestima moraju biti postavljeni i jasno vidljivi, te lako pristupačni ručni aparati za gašenje početnih požara.
- (2) U objektima Univerziteta se upotrebljavaju aparati tipa «S» (suhi prah) ili «CO2» (ugljen dioksid), odnosno drugi aparati prema namjeni objekta.
- (3) Nakon svake upotrebe vatrogasnog aparata, Univerzitetu je dužan odmah isti poslati na punjenje i kontrolu u ovlaštenu ustanovu, a svi radnici koji su upotrijebili vatrogasni aparat dužni su o tome obavijestiti neposredno nadređenog radnika ili odgovorno lice za zaštitu od požara.

## **VIII. PLAN ZAŠTITE OD POŽARA I NJEGOVO PROVOĐENJE**

### **Član 16.**

#### **(Plan zaštite od požara)**

- (1) U cilju ostvarivanja razvoja i unapređivanja zaštite od požara na Univerzitetu donosi se Plan zaštite od požara. Plan se donosi na osnovu odluke nadležnog općinskog organa i mora biti u skladu sa općinskim Planom zaštite od

požara, ukoliko isti postoji.

- (2) Plan zaštite od požara obuhvata naročito:
  - a. analizu i procjenu ugroženosti od požara;
  - b. organizaciju zaštite od požara;
  - c. sistem obavještanja i davanja uzbune;
  - d. postupak u slučaju požara;
  - e. tehničku opremu i sredstva za gašenje požara;
  - f. način snabdijevanja vodom;
  - g. puteve prolaze i prilaze;
  - h. lokaciju i klasifikaciju objekta prema namjeni i prema stepenu opasnosti od požara;
  - i. zaštitne zone i mogućnosti prenošenja požara.
- (3) Planom od požara utvrđuju se ciljevi i zadaci u pogledu organizovanja i poduzimanja mjera zaštite od požara, kojima se obezbjeđuje sigurnost imovine, radnika i posjetilaca na Univerzitetu.
- (4) Planom zaštite od požara preventivno se utvrđuju izvori opasnosti od izbijanja požara u pojedinim objektima i na Univerzitetu kao cjelini i sagledavanje mogućnosti zaštite od požara.
- (5) Sve promjene i dopune plana zaštite od požara unose se redovno kada su donijeti, a najmanje na kraju godine.
- (6) Plan zaštite od požara donosi se u skladu sa Planom zaštite od požara koji donosi nadležni općinski organ i na osnovu ocjene stanja zaštite od požara na Univerzitetu. Programom mjera zaštite od požara donosi se za svaku godinu i to najkasnije do kraja tekuće godine za narednu godinu.

#### **Član 17.** **(Obaveze i zadaci)**

- (1) Planom zaštite od požara utvrđuju se obaveze i zadaci koji se trebaju izvršiti u periodu za koji se program donosi, rokovi i način izvršenja obaveza i zadataka. Takođe se utvrđuju organi, odnosno radnici na Univerzitetu koji su odgovorni za njegovo provođenje.
- (2) Pored obaveza i zadataka iz stava 1. ovog člana, Plan zaštite od požara sadrži mjere koje se odnose naročito na:
  - a) kontrolu ispravnosti aparata i opreme za gašenje požara;
  - b) kontrola stanja u objektima/prostorijama sa stanovišta zaštite od požara, elektro instalacije, gromobranske instalacije, instalacije grijanja i sl;
  - c) kontrolu održavanja stalnih prolaza, prilaza, uzlaza i izlaza i sl;
  - d) kontrola uskladištene robe po vrstama i količini, a posebno kontroli zapaljive robe, lako zapaljivih tekućina i plina;
  - e) kontrolu otklanjanja ranije utvrđenih nedostataka u radnim i pomoćnim prostorijama i drugim mjestima na kojima radnici rade ili se kreću.

### **IX. UNUTRAŠNJA KONTROLA PROVOĐENJA PREDVIĐENIH MJERA ZAŠTITE OD POŽARA**

#### **Član 18.** **(Vršenje unutrašnje kontrole)**

- (1) Vršenje unutrašnje kontrole i staranje o sprovođenju mjera zaštite od požara obavlja osoba odgovorna za poslove zaštite od požara.
- (2) Osoba odgovorna za poslove zaštite od požara i zadužena za poslove unutrašnje kontrole provođenja predviđenih mjera zaštite od požara, nakon svakog izvršenog pregleda primjena mjera zaštite od požara, podnosi izvještaj Rektorima Univerziteta o uočenim nedostacima.
- (3) Osoba odgovorna za poslove zaštite od požara ovlaštena je, da uz saglasnost sa Rektorom izvrši otklanjanje svih nedostataka iz oblasti zaštite od požara.



## **X. MJESTO I PROSTORI U KOJIMA JE ZABRANJENA PROIZVODNJA, KORIŠTENJE I PRENOŠENJE OTVORENE VATRE**

### **Član 19. (Upotreba otvorene vatre i plamena)**

Otvorena vatra i plamen ne smiju se proizvoditi, koristiti i prenositi u prostorijama Univerziteta, osim u radnim prostorijama za potrebe izvršenja aktivnosti i zadataka u radnom procesu.

Upotreba otvorenog plamena prilikom određenih radova može se koristiti uz primjenu uobičajenih tehničkih mjera zaštite od požara.

## **XI. DUŽNOSTI RADNIKA U SLUČAJU IZBIJANJA POŽARA I NJIHOVO PONAŠANJE**

### **Član 20. (Dužnost otklanjanja opasnosti od požara)**

- (1) Svaki radnik koji primjeti neposrednu opasnost od izbijanja požara ili primjeti požar dužan je ukloniti opasnost, odnosno ugasiti požar, ako to može učiniti bez opasnosti za sebe ili druge radnike.
- (2) Ako radnik ne može sam ugasiti požar, dužan je odmah obavijestiti vatrogasnu jedinicu, te pozvati u pomoć ostale radnike da svim raspoloživim sredstvima i opremom za gašenje požara pokušaju ugasiti požar ili spriječiti njegovo daljnje širenje, odnosno da ga lokalizuju.
- (3) Radnici koji su primjetili požar ili su bili na to upozoreni, dužni su da iz neposredne blizine pakupe sve raspoložive količine vatrogasnih aparata i drugih sredstava, te da ih odnesu na mjesto požara radi gašenja požara.
- (4) Prilikom pojave požara na Univerzitetu najhitnije se preduzimaju mjere spašavanja radnika, ukoliko su njihovi životi u opasnosti, a zatim spašavanje materijalnih dobara.
- (5) Akcijom gašenja požara u početku rukovodi Rektor Univerziteta, lice koje ga mijenja ili odgovorno lice za zaštitu od požara na Univerzitetu, odnosno lice koje je prvo započelo gašenje požara, a po dolasku profesionalne vatrogasne jedinice rukovođenje akcijom gašenja požara preuzima ovlašteno lice vatrogasne jedinice.
- (6) Lice koje rukovodi akcijom gašenja požara ovlašteno je da:
  - svim licima koja ne učestvuju u akciji gašenja požara zabrani pristup na mjesto požara;
  - naredni prekid i isključenje dovoda električne energije, te drugih energenata i zapaljivih materijala, organizuje spašavanje lica i materijalnih dobara, angažuje sve radnike na akciji gašenja požara, bez obzira na radno vrijeme.
- (7) Neodazivanje radnika na poziv za gašenje požara predstavlja težu povredu obaveza iz radnog odnosa i onda kada isti nisu zbog takvog postupka radnika nastale štetne posljedice po Univerzitet.

## **XII. DISCIPLINSKA ODGOVORNOST ZBOG NEPRIDRŽAVANJA PROPISANIH MJERA ZAŠTITE OD POŽARA**

### **Član 21. (Nepoštivanje odredbi Pravilnika)**

- (1) Svaki zaposlenik Univerziteta koji ne poštuje odredbe ovog Pravilnika, odredbe zakonskih i tehničkih propisa iz oblasti zaštite od požara, te ne sprovodi propisane mjere zaštite od požara, čini težu povredu radnih obaveza i dužnosti.
- (2) Kao teža povreda radne obaveze iz oblasti zaštite od požara smatra se, naročito:

Pravilnik o zaštiti od požara (Broj: 03-1000-6/24, Datum: 22.11.2024)

- izazivanje požara, namjerno ili iz nehata,
- upotreba otvorene vatre nepoštujući zakonske propise ili pušenje na zabranjenim mjestima,
- nenamjenska upotreba vatrogasnih aparata, sprava i opreme za gašenje početnog požara, kao i njihovo namjerno oštećenje,
- neprijavljivanje požara ili nepoduzimanje mjera za gašenje početnog požara,
- ometanje akcije gašenja požara i spašavanja,
- ostavljanje neočišćenog radnog mjesta po isteku radnog vremena, koje može imati za posljedicu izazivanje požara,
- zakrčavanje vanjskih i unutrašnjih požarnih i komunikacionih puteva, te prilaza do objekata, vatrogasnih sprava i opreme i razvoda električne energije,
- upotreba i držanje lako zapaljivih tečnosti i boca tehničkih gasova na zabranjenim mjestima,
- nepristupanje obuci i provjeri znanja iz oblasti zaštite od požara.

**Član 22.**  
**(Stupanje na snagu Pravilnika)**

Pravilnik stupa na snagu danom donošenja, od kada se i primjenjuje.

*Broj: 03-1177-2-8/24*  
*Tuzla, 26.12.2024. godine*

  
PREDSJEDNIK UPRAVNOG ODBORA  
\_\_\_\_\_  
Prof. dr. sc. Adil Kurtić /